

## OJE 2019 sei liu billiaun US\$ 1.3 – GMN TV | Grupo



### **Orsamentu Jeral Estadu (OJE) tinan 2019 sei liu husi billiaun US\$1.3, tanba Ministériu barak mak husu tan orsamentu adisional.**

Reuniaun Komite Revizaun Polítika Orsamental ne'ebé hala'o durante loron rua ona iha Ministériu Finansa Aitarak Laran, Díli, ministériu barak mak aprezena sira nia proposta orsamentu adisional.

Vise Ministra Finansa, Sara Lobo Brites, hateten, objetivu husi reuniaun ne'e, atu halo revizaun ba Orsamentu Jeral Estadu tinan 2019, antes aprezena ba Parlamentu Nasional.

Tuir Sara Lobo, katak, proposta adisional ne'e, barak liu aprezena husi Ministériu Saúde no Edukasaun. Tanba ne'e, Komite Revizaun Polítika Orsamental konsidera proposta sira ne'e hotu, tanba prioridade VIII Governu nian durante mandate mak, área saúde no edukasaun.

“Orsamentu 2019 possibilidade iha aumentu, tanba ita iha prioridade lubuk ida mak Governu tenki halo, liu-liu iha área saúde no edukasaun, *ao mesmo tempo* bee moos mós ita tenki tau prioridade, infra-estrutura bázika, eletrisidade no estrada. Tanba ne'e mak orsamentu jeral Estadu 2019 possibilidade iha amumentu”, ba jornalista sira iha Ministériu Finansas Aitarak Laran Díli, Segunda (22/10).

Maibé Sara Lobo Brites, seidak bele fó númeru ne'e lolos, tanba agora dadauk diskusaun revizaun polítika orsamental sei la'o hela, no sei remata iha loron Sabadu semana ne'e.

Nia esplika, objetivu husi reuniaun ne'e, atu halo revizaun fila fali ba Orsamentu Jeral Estadu 2019 husi Ministériu sira hotu, liu-liu ba proposta adisional ne'ebé mak aprezena, no ohin (horseik), diskuti liu iha área sosial nian, no sei continua nafatin ho veteranu, tanba ida ne'e parte ida husi Ministériu sosial nian, depois mak sei tama iha área ekonomia nian.

“Ministériu sira ne'ebé diskuti tiha ona ne'e, maioria iha proposta adisional, liu-liu Ministériu Edukasaun no Saúde, tanba saúde nian ne'e atu kobre Hospital Nacional Guido Valadares, Laboratóriu Nasional, SAMES, Institutu Nasional Saúde”, relata Sara Lobo.

Nia afirma, iha reuniaun ne'e, komisaun haree no hola konkluzau katak, sei fó prioridade ba proposta sira ne'e hotu, hodi fó fali ba téknika sira atu revé fali molok atu aprezena nia montante final.

Reuniaun Komite Revizaun Polítika Orsamental, Prezidenti Komisaun mak Primeiru Ministru, no membru Komite mak Ministru nain tolu hanesan, Ministru Estadu Prezidencia Konsellu Ministru, Agio Pereira, Obras Públika, Salvador Soares dos Reis Pires, Ministru Agrikultura, Joaquim José Gusmão dos Reis Martins, Ministru Reforma Lejizlativa no Asuntu Parlamentares, Fidelis Magalhães, no Sekretária Estadu Igualdade no Inkluzau, Maria José da Fonseca Monteiro de Jesus.**cos**